

ՀԱՅԱՍՏԱՆԻ Մ. Թ. Ա. VII—VI ԴԴ. ՊԱՏՄՈՒԹՅՈՒՆՆԵՐ

Է. Լ. ԴԱՆԻՆՅԱՆ

Հայաստանի մ. թ. ա. VII—VI դդ. պատմությունը սերտորեն կապված է Ասորեստանի ու Ուրարտուի կործանման և Բաբելոնի ու հզորացող Մեդական թագավորության պատմության հետ։ Այս ժամանակաշրջանում կազմավորվեց հնագույն հայկական թագավորությունը¹։

Հետազոտությունները ցույց են տալիս, որ Թիգլաթպալասար Գ-ի (մ. թ. ա. 743 և 735 թթ.) և Սարգոն Բ-ի (մ. թ. ա. 714 թ.) արշավանքներից հետո Արմե-Շուպրիան և մի շարք այլ երկրներ անջատվեցին Ուրարտուից²։ Նշված ժամանակաշրջանում առաջատար դերը պատկանում էր Արմե-Շուպրիային (վերջինս ասորական աղբյուրներից հայտնի՝ Շուբարտու անվան ձևափոխությունն է)։ Շուբարտու երկրի տարածքի մասին Թուկուլթի-Նինուրթա Ա-ի (մ. թ. ա. 1243—1221) արձանագրություններում նշված է։ «Այն ժամանակ Բաբել, Կադմուխի, Պուշշի, Մումմի, Ալզի, Մագանի, Նիխանի, Ալայա, Տեգիմզի (կամ Տեբուրզի), Պուրուլումզի երկրները՝ շուբարեացիների ողջ ընդարձակ երկիրը, ես այրեցի կրակի մեջ»³։ Ն. Ադոնցը Արմե երկիրը թվարկում էր այն երկրների շարքում, որոնց տեղը հայտնի չէր⁴։ Դրանով էր պայմանավորված նրա նշումը. «Ուլլուբան կամ Խուլփի կաղան Շուպրիայի մասը չէր կազմում. նա մնում էր Ուսուսուանի (Սասուն կամ Սասունի կաղան) հետ միասին Ուրարտուի իշխանության տակ...»⁵։ Ս. Երեմյանը Արմե-Շուպրիայի տեղագրության մասին հանգել է հետևյալ եզրակացությանը. «Դեռևս հին բաբելոնական դարաշրջանում, Շուբարտու անվան տակ հասկացվում էր ողջ Հյուսիսային Միջագետքը ընդհուպ մինչև Հայկական Տավրոսի ճյուղավորությունները։ Ավելի ուշ շրջանում այդ անվամբ, Շուպրիա (Շուբրիա) ձևափո-

¹ Մինչև այժմ այս հարցի շուրջ կատարված հետազոտությունների մասին տե՛ս Ս. Տ. Երեմյան, Հայկական առաջին պետական կազմավորումները («Պատմա-բանասիրական հանդես», 1968, № 3, էջ 91—120), Գ. Ա. Տիրացյան, Երվանդունիները Հայաստանում (ՀՍՍՀ ԳԱ «Տեղեկագիր», 1958, № 6, էջ 53—61), Նույնի՝ Հին հայկական պետության առաջացումը («Պատմա-բանասիրական հանդես», 1966, № 4, էջ 63—102), Լ. Ժամկոչյան, Հայաստանը նախնադարյան համայնական հասարակության և ստրկատիրության շրջանում («Հայ ժողովրդի պատմություն», պրակ. 1, Երևան, 1961, էջ 133—134), С. Тоуманов, Studies in Christian Caucasian History. Georgetown, 1963, էջ 32, 278—279, Ժ. Գ. Էլշիրեկյան, Երվանդունիների ժազման հարցի շուրջը («Պատմա-բանասիրական հանդես», 1971, № 2, էջ 107—108) և այլն։

² Б. Б. Пиотровский, История и культура Урарту, Ереван, 1944, էջ 91. Г. А. Меликишвили, Наирн-Урарту, Тбилиси, 1954, էջ 276, Ս. Տ. Երեմյան, Հայ ժողովրդի կազմավորման ընթացքը («Պատմա-բանասիրական հանդես», 1970, № 2, էջ 47)։

³ И. М. Дьяконов, Ассиро-вавилонские источники по истории Урарту («Вестник древней истории», 1951, № 2, էջ 267—269)։

⁴ Ն. Ադոնց, Հայաստանի պատմություն, Երևան, 1972, էջ 214։

⁵ Նույն տեղում, էջ 200։

խոթյամբ, կոռվել է... բարձր լեռնային շրջանը, ներկայիս Սասունը, ուր շատ երկար պահպանվել է սկզբնական խուրրիական բնակչությունը: ...Սկսած 9-րդ դարից, Ուրարտուն ընդարձակվելով հասավ նաև Շուպրիա երկրին, բայց մինչ այդ երկիրն արդեն այնքան էր յուրացված նոր եկվորների՝ ուրումեացիների կամ արմենների կողմից, որ Շուպրիա անվան փոխարեն ուրարտական արձանագրություններում օգտագործվում են Ուրումե (ՎՁԴ. Ուրմեուխի) և Արմե անունները⁶, Արմե-Շուպրիայի տեղագրության, ինչպես նաև Ուլլուբայի մասին հստակ պատկերացում է տալիս նաև Քուլիմերի (Քղիմար), Ուպումու (Ափում) և Աշշուրիքիշա (Քիշ) քաղաքների հիշատակությունն ասուրական և մասամբ ուրարտական աղբյուրներում⁷:

Մենուա (մ. թ. ա. 810—786), Արգիշտի Ա (մ. թ. ա. 786—764) և Սարգուրի Բ (մ. թ. ա. 764—735) ուրարտական թագավորների օրոք Արմե-Շուպրիան ռազմական գործողությունների թատերաբեմ էր: Այսպիսով պատահական չէ Արմե-Շուպրիայի անջատումը Ուրարտուից՝ մ. թ. ա. VIII դ. վերջին տասնամյակներում տեղի ունեցած դեպքերից հետո, քանի որ տեղական ցեղային միությունն օգտվեց Ուրարտուի համար անբարենպաստ պայմաններից: Ինչ վերաբերում է տարածքային կորստից հետո Ուրարտուի հետագա վիճակին, ապա Բ. Բ. Պիոտրովսկին Ռուսա Ա-ի (մ. թ. ա. 735—713) թագավորության մայրամուտին հաջորդած ժամանակաշրջանի վերաբերյալ գրում է. «Սեպագիր հուշարձանները վկայում են Արգիշտի Բ-ի (713—685) ինտենսիվ շինարարական աշխատանքների մասին երկրի կենտրոնում և մասնավորապես այն տեղերում, որտեղով անցել է Սարգոնի բանակը»⁸: Հետաքրքիր է նշել, որ Ռուսա Բ-ն (մ. թ. ա. 685—645) արշավում է Մուշկինի, Խաթե և Խալիաու երկրների վրա⁹: Կարելի է եզրակացնել, որ Արմե-Շուպրիան նշված և հետագա ժամանակաշրջաններում չի կազմել Ուրարտուի օրգանական մասը¹⁰: Ուրարտուից և Ասորեստանից այնտեղ փախած ստրուկները և այլ դժգոհ տարրերը¹¹ ապաստան էին գտել այժմյան Սասունի լեռներում: Դրա հետևանքով

6 Ս. Ս. Երեմյան, Հայերի ցեղային միությունը Արմե-Շուպրիա երկրում («Պատմա-բանասիրական հանդես», 1958, № 3, էջ 61, 68), հմտ. «Պատմա-բանասիրական հանդես», 1966, № 4, էջ 90—91 և «Вестник древней истории», 1951, № 2, էջ 261, 281, ժան. 15):

7 «Вестник древней истории», 1951, № 2, էջ 299, 314, № 3, էջ 219, 221, Г. А. Мелникишвили. Урартские клинообразные надписи, М., 1960, № 41 В₅, 40 л. с. В₅, «Պատմա-բանասիրական հանդես», 1958, № 3, էջ 64 և 67, քարտեզ. «Արմե-Շուպրիա երկիրը XII—VIII դդ. մ. թ. ա.», տե՛ս նաև Я. А. Мачандян, О некоторых спорных проблемах истории Древней Армении, Ереван, 1956, էջ 141—142: Н. Адонц, նշվ. աշխ., էջ 200:

8 Б. Б. Пиотровский, Ванское царство, М., 1959, էջ 112:

9 Г. А. Мелникишвили, նշվ. աշխ., № 278, էջ 341:

10 Արմե-Շուպրիան հանդիսացավ հայ ժողովրդի կազմավորման կենտրոններից մեկը: Այս տեսակետից նշանակալից է Ս. Երեմյանի այն հետևությունը, որ հայ ժողովրդի ձևավորման կենտրոններից մեկը պատմական Հայաստանի տարածքում եղել է «Մոփր-Աղձնիք՝ Արեւելյան Բիրատ-Արածանիի և Արեւմտյան Տիգրիսի հովիտներում (Արմե-Շուպրիա)», («Պատմա-բանասիրական հանդես», 1970, № 2, էջ 29): Այսպիսով՝ պատահական չէր, որ այնտեղ առաջ եկավ առաջին հայկական պետական կազմավորումը:

11 «Вестник древней истории», 1951, № 3, էջ 218, 220:

Ասարխադդոնը մ. թ. ա. 673 թ. նոյեմբեր-դեկտեմբերին արշավանք ձեռնարկեց և դաժան հաշվեհարդար տեսավ նրանց հետ: Ըստ երևույթին այդ արշավանքի պատճառն էր նաև Սինախերիբին (մ. թ. ա. 705—681) սպանողների՝ Արադ-Նիլիիների (Ադրամեիլեք) և Շարեցերի (Սարասար կամ Սանասար), ինչպես նաև այլ խռովարարների փախուստը Արմե-Շուպրիա:

Այս ենթադրությունը բխում է Ասարխադդոնի նամակի բովանդակությունից, որի համաձայն նրանք, «որոնք մեղք են գործել, արյուն են թափել, [...] հրամանա]տարները, գավառապետները, հսկիչները, կառավարիչները, պետերը փախել են Շուպրիա»¹²: Ամենայն հավանականությամբ, այստեղ հիշատակված են Սինախերիբի սպանության հետ կապ ունեցողները: Այն, որ Սինախերիբի սպանությունը պատահական դեպք չէր, այլ մեծ խռովության արդյունք, իմանում ենք «Բաբելոնյան ժամանակագրության» այն հատվածից, որտեղ նկարագրված անցքերը հաջորդում են Սինախերիբի սպանությանը. «Տեբետ ամսվա 20-րդ օրից մինչև ադար ամսվա 2-րդ օրը Ասորեստանում շարունակվում էր խռովությունը: Ադար ամսվա (") 8-րդ օրը Աշշուրախիդդինը բարձրացավ Ասորեստանի դահր... 2-րդ տարում (679)... (Կիմմ)բեները արշավեցին Ասորեստանի վրա և Ասորեստանում ջախջախվեցին...»¹³: Աշշուրախիդդինի 8-րդ տարում (մ. թ. ա. 673) տեբետ ամսին, օրը — ջախջախվեց, գրավվեց շուպրիացիների երկիրը»¹⁴:

Ինչպես տեսնում ենք, մ. թ. ա. 681/680 թթ. խռովությունը մեկ ամսից ավելի է տևել: Դրա մասին իմանում ենք նաև Աստվածաշնչի «Գիրք թագաւորութեանց» Դ գրքից. «Եւ շուեաց զնաց, և դարձաւ Սենեքերիմ արքայ ասորեստանեայց՝ և բնակեաց ի Նինուէ: Եւ եղև մինչդեռ երկիր պագանէր ի տան Նեսորայ աստուծոյ իւրում, Ադրամեիլեք և Սարասար, որդիք նորս: Հարին զնա սրով, և ինքեանք զերծան յերկիրն Արարադայ և թաղաւորեաց Ասորդան որդի նորա ընդ նորա»¹⁵:

Այդ փաստը արձանագրվել է նաև հայ պատմագրության մեջ: Մովսես Խորենացին, խոսելով Սենեքերիմ (Սինախերիբ) թագավորի սպանության մասին, նշում է, որ Ադրամեիլեքը և Սանասարը. «եկին փախստական առ մեզ: Յորոց զմինն յարեմտից հարաւոյ աշխարհիս մերոյ, մերձ ի սահմանս նորին Ասորեստանի, բնակեցուցանէ Սկայորդին մեր քաջ նախնին, այս ինքն է

¹² Նույն տեղում, էջ 218:

¹³ Շարունակությունում խոսվում է Ասարխադդոնի թագավորության IV տարվա մասին:

¹⁴ «Вестник древней истории», 1951, № 3. էջ 215: Դ. Ուայդմանը Ասարխադդոնի մ. թ. ա. 673 թ. արշավանքը դեպի Շուպրիա բացատրում է կիմերների կողմից սպառնացող վտանգով (D. J. Wiseman. The Vassal-Treaties of Esarhaddon, «Iraq», vol. XX, London, 1958, էջ 10), այնինչ այն, ինչպես երևում է, ունեւ սոցիալ-քաղաքական դրդապատճառներ:

¹⁵ «Գիրք աստուածաշունք հին եւ նոր կտակարանաց». ի Վենետիկ, 1860, գլ. ԺԻ, 36—37, էջ 347:

Դ. Ուայդմանը. հիմնվելով միայն «Աստվածաշնչի» հաղորդման վրա, բնդհանուր ձեռով նշում է, որ խռովարարները ապաստան գտան Ուրարտուում (D. J. Wiseman, նշվ. աշխ., էջ 6):

դՍանասարն. և ի սմանէ աճումն և բազմասերութիւն լեալ՝ լցին զՍիմն ասացեալ լեառն»¹⁶,

Ուրարտուն այդ ժամանակ բարիդրացիական հարաբերությունների մեջ իր Ասորեստանի հետ։ Ուրեմն սպանության մասնակիցները և նրանց միացած խոռվարարները չէին կարող ապաստանել Ուրարտուում։

Աստվածաշնչի աղբյուրին Արմե-Շուպրիան հայտնի է եղել Արարադ (=Ուրարտու) անունով։ Աստվածաշնչի վրացերեն թարգմանությունում նրան հոմանիշ է «Սոմխիթի»—«Սոմխեթին», այսինքն՝ «Հայք»—Հայաստանը¹⁷։ Պատմահայրը, ամենայն հավանականությամբ, Սենեքերիմի սպանության և հարակից հարցերի մասին տեղեկություն է քաղել «Աստվածաշնչի» վերը նշված հատվածից, ուստի և առանց վարանելու «Արարադ» անվան փոխարեն (որը սկետք է հասկանալ ոչ թե Թմանի մոտ գտնվող լեռը, այլ Ուրարտու) ասում է «առ մեզ»։ Այսպիսով կասկած չի հարուցում, որ Սենեքերիմին սպանողները և նրանց կողմնակիցները ապաստան էին գտել Արմե-Շուպրիայում¹⁸։ Դրա վառ ապացույցն է Սիմ լեռան հիշատակությունը։

Ինչ վերաբերվում է «Սկայորդի» անվանը, ապա դրա ստուգաբանությունն առաջին անգամ տվել է Գ. Ղափանցյանը. «Skai-ordi» չի նշանակում տառացի սկայի (սակի) որդի, այլ՝ սակ ցեղից, սակ տոհմից»¹⁹։ Կարելի է ասել ավելին՝ «Սկայ» բառի կողքին առկա է «որդի» բառը ստացված հապլոլոգիայով «ururdi» ցեղանունից, որը հանդիպում է Սարդուրի Բ-ի արձանագրությունում²⁰։ Գ. Ղափանցյանը առաջինը գտավ, որ այն կարող է նշանակել «խնամելի և հարազատ ժողովուրդ, որպես երկրի գլխավոր ժողովուրդ»²¹։ Նա «Սկայորդի» անվան մեջ ճիշտ է անջատում «ordi» մասը։ Ընդունելով այդ, գտնում ենք, որ կապ գոյություն ունի «ururdi» և «ordi» բառերի միջև, քանի որ, ինչպես ինքն է նշում, «O» ձայնավորը բեռնագրով արտահայտվում է «U» զրուծյամբ»²²։ Այնպես որ «ururdi» պետք է հնչեր «orordi»²³ և հապլոլո-

¹⁶ «Մ ո վ ս ի ս ի և ո Ր ե ն ա ց ւ ո յ Պատմութիւն Հայոց», Տփղիս, 1913, էջ 70։ Ինչպես նշում է Ս. Սրեմյանը, «Հայկական էպոսը նույնպես հաղորդում է այդ իրադարձության մասին և Սանասուն կամ Սասուն զավառի անվանումը կապում է Սանասարի անվան հետ, ընդ որում նրանից և Ադրամելեթից է սերում «Սասնա ծռեր» Մհերին ու Սասունցի Դավթին» («Պատմա-բանասիրական հանդես», 1970, № 2, էջ 50)։

¹⁷ Նույն տեղում, էջ 50—51։

¹⁸ Հմմտ. Б. Б. Пиотровский. О происхождении армянского народа, Ереван, 1948, էջ 20։

¹⁹ Գ. Ղափանցյան, Ուրարտուի պատմություն, Երևան, 1940, էջ 217, ծան. 1։

²⁰ Г. А. Меликшвили, Урартские клинообразные надписи, 155G₁₁, 288. «ururdi» տևս նույն տեղում, էջ 412։ Գ. Մելիքիշվիլին այն բացատրում է որպես որոշակի կարգի մարդկանց անվանում (նույն տեղում, էջ 289, ծան. 8)։

²¹ Գ. Ղափանցյան, նշվ. աշխ., էջ 133։

²² Նույն տեղում, էջ 226։ Ի. Մ. Դյակոնովը դրում է. «Հայկական սատրապությունները բարեկոնացիների մոտ շարունակվում էին անվանվել «Ուրարտու» (ավելի ճիշտ՝ «Urastu» կարդա «*Oralt») (И. М. Дьяконов, История Мидии, М., 1936, էջ 334)։

²³ Այս տեսակետից հետաքրքիր է Ս. Սրեմյանի նշումը. «Օրդոթ, ինչպես և Որթք, Որդորու, Որդսպու տեղանունների մեջ պահպանվել է ուրարտացիներ նշանակող էթնիկական անունը» («Պատմա-բանասիրական հանդես», 1968, № 3, էջ 115)։ Ըստ նրա բանավոր հաղորդման՝ Պտղոմեոսի «Աշխարհագրությունում» Հայաստանում հիշատակվող 'Օբոբդդյդ կամ Βορδδդյ (C. I. a u d i i P t o l e m a e i Geographia, Parisis, 1901, ed. C. Müllerus, vol. primi, pars 2, V. 12, 6, ծան. 11) անհրաժեշտ է ուղղել 'Օբբդդյդ կամ 'Օբդդյդ, որը նույնն է, ինչ

զիայով «urdi» = «ordi»: Այս տեսակետից հետաքրքիր է «ժողովուրդ» բառի ստուգաբանությունը²⁴, Մեր կարծիքով այն բարդ բառ է, կազմված «ժողով» և «ուրդ» բաղադրիչներից, որոնցից վերջինը առաջացել է հետևյալ կերպ՝ «urdi» = «orordi» > «urdi» = «ordi» < «urd» = «ord», քանի որ ինչպես նշում է Ի. Դյակոնովը, «վերջին e/i, ըստ երևույթին, թույլ ամփոփված ձայնավոր էր, վերանալու միտումով»²⁵, նշենք, որ Գ. Ղափանցյանը Անձիտի գավառի խար-բերդի դաշտում հիշատակվող «որտա» ցեղանունը հապլոլոգիայով հանում է «ororta-ից» (ամենայն հավանականությամբ նկատի ունի «orordi»), վերջինս համարելով «arart» բառի բնափոխությունը²⁶:

Կարելի է տեսնել, որ «ururd(i)» || «orord(i)» || «olord» || «alarod(oi)» || Արարադ||Արարատ||Այրարատ:

Ինչպես տեսնում ենք, ururdi-ն մասնակցել է «ժողովուրդ» բառի կազմավորմանը: Վերջինս նախնական իմաստով կարող էր նշանակել «ուրարտացիների ժողով» և ապա վերածականանալով ստանալ ընդհանրապես «մարդկանց ժողով» իմաստը: Դրա հետ մեկտեղ ururdi բառը կորցրել է նախնական նշանակությունը, վերածվելով՝ ուրդ(=որդ(ի)) ածանցի (ժողով ururd(i) > urd): Այն «ժողովուրդ» բառում օգտագործվելով տարբեր էթնիկական միավորների կապակցությամբ, մասնակցել է նաև տարբեր բառակապակցություններում կոնկրետ էթնիկական միավորի գաղափարով, ինչպիսին է, օրինակ, «Սկայորդին», որը նշանակելով «սկայ» (սակ) էթնոսից, տվյալ դեպքում այնքան է նեղացել իմաստով, որ ստացել է սեփական անվան նշանակությունը²⁷: Այդպիսի անուն հնարավոր է, որ հանդիպի մ. թ. ա. VII դ. արձանագրություններում:

Ըստ երևույթին Մովսես Խորենացուն, կամ ավելի շուտ նրա աղբյուրին, հայտնի է եղել սկյութների իշխանությունը²⁸ Հայկական լեռնաշխարհի որոշ

Մովսես Խորենացու հիշատակած «Որդունի» նախարարության անվանումը (Մովսես խորենացի, էջ 38, 114, 258): Բառիս -(դ)՝ մասնիկը բնորոշ էր հույների կողմից տրվող տեղանուններին (օրինակ՝ Σαφίον, Δαλιαν, և այլն): Այնպես որ մնում է orord(e) = orord(i)։

²⁴ Լ. Աճառյանը այն մեկնում է «ժողով» բառի տակ. առանց ստուգաբանության (Լ. Աճառյան, Հայերեն արձատական բառարան, Երևան, 1973, հ. 2, էջ 232—233): Այն չի ստուգարանում նաև Ս. Էլոյանն իր «Ածանցները ժամանակակից հայերենում» աշխատության մեջ (Երևան, 1963, էջ 168), ուր գրում է. «ուրդ ածանցով ևս պահպանված են մի քանի կազմություններ, որոնցում -ուրդ ածանցը վաղուց արդեն իմաստի մթացում է ապրել և բառացի, օրինակ՝ ...ժողովուրդ...»:

²⁵ «Материалы к фонетике урартского языка», էջ 49 (сб. «Вопросы грамматики и истории восточных языков», М.—Л., 1958).

²⁶ Գ. Ղափանցյան, նշվ. աշխ., էջ 134, 226:

²⁷ Նմանօրինակ բառերի շարքում կարելի է դասել նաև «Սկորդի» ցեղանունը, որը նույնպես երկու մասից է կազմված՝ «Սկ» և «որդի», որոնցից առաջինը Ս. Տ. Երեմյանի բանավոր հաղորդմամբ՝ կապված է Σαφίριος (Herodotus, (The Histories). With an English transl. by A. D. Godley, in 4 vol., Mass.—London, 1946—1960, I. 125) իբրևական ցեղի անվան հետ, իսկ երկրորդը, ինչպես վերը նշեցինք, էթնիկական երանդ ունեցող ածանց է:

²⁸ Կիմերների և ապա սկյութների քոչվոր ցեղերը մ. թ. ա. VIII—VII դդ. ղգալի փոփոխություն մտցրին Առաջավոր Ասիայի քաղաքական վիճակում (տե՛ս Н. М. Дьяконов, նշվ. աշխ., էջ 228—292, Б. Б. Пнотровскии, Ванское царство, էջ 232—256: Ս. Տ. Երեմյան, Կիմերական ու սկյութական ցեղերի արշավանքները և Ուրարտուի ու

տարածքի վրա, որքանով կարելի է դատել Սկայորդի, Պարույր, «Ասքանազ-յան գունդ» և այլ անուններից²⁹։

Հայկական աղբյուրներում Արմե-Շուպրիայի, որպես Հայաստանի մաս, հանդես գալու մասին է խոսում նաև այն փաստը, որ ասորեստանցիների տիրապետությունը կապվել է կիսաառասպելական Սեմիրամիսի (Շամիրամի)³⁰ հետ և ալդ անցքերը պետք է վերաբերեն Արմե-Շուպրիայում Ասորեստանի երկու տասնամյակ (մ. թ. ա. 673—652) տևած գերիշխանությանը, դրա դեմ մղված պայքարին և արձագանքներին։ Այդ տեղեկությունների բնույթի մասին Ս. Երեմյանը գրում է. «Հայկական պատմական ավանդություններում Ասորեստանի տիրապետության ժամանակաշրջանի վերաբերյալ պահպանված հուշերը, հավանաբար, վերաբերում են հենց այդ քսանամյակին...»³¹։

Հայ մատենագիրների մոտ կիսաառասպելական Շամիրամի կերպարի ընդգրկումը և, որոշ վերապահությամբ, նրա ժամանակաշրջանի համընկնումը Ասարիսագդոնի կողմից մ. թ. ա. 673 թ. Արմե-Շուպրիայի նվաճման հետ, վկայություն է այն մասին, որ, չնայած որոշ անախրոնիզմին, հայկական ավանդությունում որոշ չափով արտացոլվել են մ. թ. ա. VII դ. առաջին կեսում Արմե-Շուպրիայում տեղի ունեցած դեպքերը։

Հայկական ավանդությունում բնորոշ է արալեզների՝ սրբազան շների հանդես գալը։ Սակայն շան սրբագործությունը բնորոշ էր իրանական աշխարհին և այնտեղից պետք է անցնեն հայկական ավանդություն³²։ Ըստ երևույթի, դրա բերողներն են եղել սկյութները, որոնք այս շրջանում տարածվեցին Առաջավոր Ասիայում³³։ «Սակերը,— գրում է Ստրաբոնը,— ասպատակում

Ասորեստանի պայքարը քոչվորների դեմ («Պատմա-քանասիրական հանդես», 1968, № 2, էջ 89—116)։

²⁹ Սրանց շարքին թերևս կարելի է դասել նաև «Ասպակունեաց ձոր» աշխարհագրական անունը, որի մասին Ս. Ս. Երեմյանը գրում է. «Հայտնի է, սկյութների իշպակա ցեղապետը, որի անունը նշանակում է կամ «Աspaka»՝ «ծիրավոր», կամ «Spaka»՝ «շուն»։ «Սկայորդին» կարող է լինել և «S/pa/kay-ordi», -pa- վանկի հետագա սղմամբ։ Այս դեպքում «Աspaka» = «Spaka-ն» կապվում է Սասունի մասը կաղմող «Ասպակունեաց ձոր» դավառի անվան հետ, որը պետք է լինեն Արմե-Շուպրիայում իշխող «Ս(պա)կայորդու» դինաստիայի կենտրոնը և պետք է ենթադրել այժմ Քաղթիկ կոչվող գյուղի տեղում» («Պատմա-քանասիրական հանդես», 1968, № 3, էջ 98, ծան. 28)։

³⁰ Մ ո վ ս ն ո ս ո Ր Ե Ն Ա Յ Ի, էջ 64, «Ս Ե Բ Է Ն Ս Ե Վ Ի Ս Կ Ի Ս Կ Ո Վ Ս Ի Պ ա տ մ ու թ Ի ն», Երևան, 1939, էջ 6։

Այն, որ առասպելում նկարագրված դեպքերի արեալը համապատասխանում է Հայաստանի հարավին, նաև երևում է Արայի որդի՝ Կարգոսի անունից, որը, ինչպես ցույց է տվել Ք. Պատկանյանը, կարգուխների էպոնիմն է և որից նախկինում Արաքս գետի վրա երկիրը հետագայում անվանվել է Կորգոս (К. П. Патканов, Ванские надписи и значение их для истории Передней Азии, СПб, 1881, էջ 81, հմմտ., Я. А. М а н а н д я н, О некоторых спорных проблемах истории Древней Армении, Ереван, 1956, էջ 154)։

³¹ «Պատմա-քանասիրական հանդես», 1968, № 3, էջ 97։

³² Հմմտ. Գ. Ղ ա փ ա ն ջ յ ա ն, Արա Գեղեցիկի պաշտամունքը, Երևան, 1945, էջ 25 և 27։ Գ. Ղափանցյանը գրում է. «Ընթանալով կարծում էր, որ Կտեսիասի կողմից ավանդված Շամիրամյան դրույցները ծագել են ոչ թե Ասորեստանում, այլ մեզական շրջանում, որտեղից անցել են Հայաստան... Արա-Շամիրամ հայ առասպելը հիմնովին ձևակերպվել է 7—6-րդ դարերի միջև»։

³³ 2. Մ ա ն ա ն դ յ ա ն, Հին Հայաստանի և Անդրկովկասի մի քանի պրոբլեմների մասին, Երևան, 1944, էջ 6—13։

էին ինչպես կիմերները և տրեբները³⁴ հեռավոր և մոտ տարածություն վրա: Այդպես նրանք զավթեցին Բակտրիանան, իսկ Հալաստանում՝ լավալույն տարածքը, որին թողին իրենց անունը՝ Սակասենե, նրանք հասան ընդհուպ մինչև կապադովկացիների երկիրը, մասնավորապես նրանց մոտ, ովքեր ապրում են Եվքսինյան ծովի մոտ և այժմ կոչվում են պոնտիկներ: Այն ժամանակ այն երկրում գտնվող պարսկական զորավարները հարձակվեցին նրանց վրա գիշերը՝ ավարը բաժանելուց հետո, համաժողովրդական տոնի ժամանակ և իսպառ ոչնչացրին այդ ցեղը»³⁵:

Հերոդոտը այս նույն անցքերը նկատի ունի գրելով. «Սկյութները Եվրոպայից դուրս մղեցին կիմերներին և նրանց հետապնդելով (Ասիայում) ներխուժեցին Մեդական հողը: Սկյութները... քնացին վերին, ավելի երկար ճանապարհով, աչ կողմում թողնելով Կովկասյան լեռները: Այստեղ մեդացիների և սկյութների միջև ճակատամարտ տեղի ունեցավ: Մեդացիները պարտվեցին... իսկ սկյութները իրենց գերիշխանությունը տարածեցին ամբողջ Ասիայի վրա...: Սկյութները 28 տարի իշխեցին Ասիայում...»³⁶: Մի անգամ Կիաքսարը և մեդացիները բազմաթիվ սկյութներ հրավիրեցին, հարբեցրին և ապա կոտորեցին: Այդպիսով մեդացիները վերականգնեցին իրենց տերությունն և յախեցին վեհոսկյութները»³⁷:

Ինչպես Հերոդոտը, այնպես էլ Ստրաբոնը նկարագրում են մ. թ. ա. VII դ. առաջին տասնամյակներին³⁸ և երկրորդ կեսի անցքերը: Դրանցից երևում է սկյութների զբաղեցրած տարածքը՝ Սակասենը (Շակաշենը), որտեղից նրանք կարող էին ղնալ ինչպես Մանա, այնպես էլ արևմուտք՝ Կապադովկիա, Պոնտոս և Պաղեստինյան Ասորիք: Արևմտյան արշավանքների ժամանակ սլետը է տեղի ունենար նրանց բնակեցումը Արմե-Շուպրիայում³⁹:

³⁴ Սակերը սկյութական ցեղ էին: Ինչպես հետևում է Ստրաբոնի վկայություններից, արևելքից արշավանքներում սերտորեն դործում էին կիմերների հետ (Strabo, The Geography With an English transl. by H. Jones, in 8 vol. Mass.—London, 1954—1961; I. 3. 21 XIV, I. 40 և այլն):

³⁵ Strabo, XI. 8. 4.

³⁶ Ի. Դյակոնովի ճշումներ՝ սկյութները Ասիային տիրել են մ. թ. ա. 652—625 թթ. (И. М. Дьяконов. Взд. աշխ., էջ 289):

³⁷ Herod, I. 103—106.

³⁸ Մ. թ. ա. VII դ. 70-ական թվականներին ասորական աղբյուրները հիշատակում են Եվրոպա երկրի թագավոր Պարտատուային: Ի տարբերություն Ի. Դյակոնովի, Դ. Ուայզմանը կարծում է, որ Իշպական է հաջորդել Պարտատուային և, վերջինիս ամուսնությունը ասորեստանյան արքայազստեր հետ տեղի է ունեցել մ. թ. ա. 679 թ. (D. J. Wiseman, Взд. աշխ., էջ 10, ծան. 98): Ի. Դյակոնովի ենթադրությունն ավելի հավանական է: Պարտատուայի ու ասորեստանյան արքայազստեր ամուսնությունից հետո Սկյութական թագավորությունը դառնում է Ասորեստանի հավատարիմ դաշնակիցը (տե՛ս: И. М. Дьяконов, Взд. աշխ., էջ 272—273): Ըստ երևույթին, այդ դաշինքն ապահովում էր Ասորեստանի տիրապետող դիրքը: «Եվրոպա երկիրը» ընդգրկում էր Կովկասից մինչև Ուրմիա լճի ավազանը: Այսպիսով, սկյութները VII դ. առաջին կեսում Առաջավոր Ասիայում նշանակալից քաղաքական ուժ էին:

³⁹ Արմե-Շուպրիայում բազմազան էթնիկական տարրերի՝ տեղական խուրրի-ուրարտական, եկվոր մուշկերի-արիմների կողքին ի հայտ են գալիս սկյութները: Հավանաբար այդ ցեղերը գտնվում էին ռազմական ղեկավարության փուլում: Երկրի տեղական ավազանու կողքին համադես է գալիս սկյութական ավազանին: Կարևորն այն է, որ Արմե-Շուպրիայում այնպիսի պայմաններ էին ստեղծվել, որ խոլընդոտներ չէին ստեղծվում խաղաղ ճանապարհով բնակություն հաստատող եկվոր տարրերի համար («Պատմա-բանասիրական հանգես», 1966, № 4, էջ 93—

Մ. թ. ա. 653 թ. ապստամբում է ասորեստանյան թագավոր Աշշուրբանապալի (մ. թ. ա. 669—մոտ. 633) եղբայր Շամաշշումուկինը, որը Ասորեստանի վասալ Բաբելոնի թագավորն էր⁴⁰։ Այդ ապստամբությունը, ինչպես նաև մինչ այդ Եգիպտոսի անջատումը⁴¹ Ասորեստանին ծանր կացություն մեջ դրեցին։ Ինչպես ճիշտ կռահել է Ի. Դյակոնովը, Ասորեստանի դեմ մարտնչող երկրների թվում էր նաև Մարաստանը, որի դեմ Աշշուրբանապալը հանեց սկյութներին։ Սրանց զորքը, ինչպես վկայում է Հերոդոտը, ռզնակավարում էր Մոդիոսը, Պրոտոթիոսի որդին...»⁴² և հենց այդ ժամանակվանից ի վեր 28 տարի սկյութները տիրեցին Ասիային։

Թվում է թե Ասորեստանի դիրքերը նորից ամրապնդվում են։ Այդ է վկայում նաև մ. թ. ա. 639 թ. Աշշուրբանապալի մոտ Սարգուրի Գ-ի (մ. թ. ա. 645—635) ուղարկած պատգամավորության մասին եղած արձանագրությունը. «Սարգուրին, լսելով իմ հզորության և սխրագործությունների մասին, որոնք ինձ շնորհել են մեծ աստվածները, ողջունեց իմ մեծությունը, ինչպես որդին հորը և դրան համապատասխան գրել է. ողջունյալ թագավորին՝ իմ տիրոջը»⁴³։

Ամենայն հավանականությամբ Ուրարտուին այդ ժամանակ սպառնում էին Մադիոսի զորքերը։ Աշշուրբանապալը, ինչպես Մեդիայի, այնպես էլ Ուրարտուի հանդեպ միևնույն քաղաքականությունն էր վարում՝ նրանց դեմ հանելուժ իր դաշնակից սկյութներին։ Այդ տարիներին Ուրարտուի տարածքում տեղի ունեցող ղեպքերի կասկածնությունը Ս. Երեմյանը գրում է. «Ըստ երևույթին այդ թագավորից (Սարգուրի Գ-ից — է. Դ.) հետո ուրարտական դինաստիան անկում է ապրում և սկյութները (հավանաբար հայերի հետ միասին) դառնում են կացության տերը» և ապա եզրակացնում է, որ «Ուրարտուում թագավորական իշխանության անկման և սկյութների տիրապետության ժամանակը համապատասխանում է մոտավորապես 635—624 թվականներին (մ. թ. ա.)»⁴⁴։

Մ. թ. ա. VII դ. վերջին քառորդում Առաջավոր Ասիայում քաղաքական հզոր ուժ է հանդես գալիս՝ Մեդական աշխարհակալությունը, որի թագավորն էր Կիաքսարը (մ. թ. ա. 625—584)։ Նրա գլխավորությամբ տապալվեց սկյութների գերիշխանությունը։ Վերը նշվածի հետ մեկտեղ Հերոդոտի վերոբերյալ հաղորդմանը համապատասխանում են Ստրաբոնի աշխատության հետևյալ տողերը. «Կյուրոսը արշավեց սակերի վրա, սակայն, պարտվելով մարտում,

94)։ Դրան նպաստում էր այն, որ Արմե-Շուպրիա միությունը ցեղային միություն էր («Պատմա-բանասիրական հանդես», 1970, № 2, էջ 45)։ Այդ բարենպաստ պայմաններում էին Արմե-Շուպրիայում ապաստանում Ասորեստանից ու Ուրարտուից այստեղ եկող փախստականները։ Կարելի է նաև ենթադրել, որ Արմե-Շուպրիայում ռազմական ուժ էր ստեղծվում (որում ընդ-դրվեցին նաև սկյութները և վերը նշված փախստականները), որը վտանգ էր ներկայացնում նաև Ասորեստանի համար և թերևս նաև այդ սպառնալիքի վերացմանն էր ուղղված Ասարխադ-դոնի մ. թ. ա. 673 թ. արշավանքը։

⁴⁰ И. М. Дьяконов, *Изд. 2-е*, т. 2, 287, *Замеч.* D. J. Wiseman, *Изд. 2-е*, т. 7, *Вавилонский царский указ* Շամաշշումուկինը ապստամբել է մ. թ. ա. 651 թ. (էջ 8)։

⁴¹ В. В. Струве, *Хронология VI века до н. э. в труде Геродота* («Этюды по истории Северного Причерноморья, Кавказа и Средней Азии», Л., 1968, էջ 90)։

⁴² Herod., I, 103.

⁴³ Б. Б. Пиотровский, *Ванское царство*, էջ 115.

⁴⁴ «Պատմա-բանասիրական հանդես», 1968, № 3, էջ 98.

փախաւ⁴⁵, Ալա Ստրաբոնը պատմում է մեղական զորավարի ռազմական խորամանկության և սակերի կոտորածի մասին: Այդ իրադարձությունները, ինչպես վերը տեսանք, Ստրաբոնը նկարագրում է անմիջապես նրանց կողմից Շակաշեն-Սակասենեն զբաղեցնելուց հետո, այնինչ այդ դեպքերի միջև ընկած են մի քանի տասնամյակներ:

Անհրաժեշտ է նաև նշել, որ այստեղ Ստրաբոնը Կիաքսարի զործողությունները վերագրել է Կյուրոս Բ Մեծին (մ. թ. ա. 550—529):

Հենվելով Գ. Ղափանցյանի, Բ. Պրոտորովսկու, Ի. Դյակոնովի հետազոտությունների վրա և ևս մեկ անգամ համեմատելով Հերոդոտի և Մովսես Խորենացու տվյալները Պրոտորովսկու = Պարտատուայի և Պարուլրի վերաբերյալ, Ս. Նրեմյանը գրում է. «Հերոդոտը 612 թվականի իրադարձությունների մասնակից է դարձրել ոչ թե նրան, այլ նրա որդուն՝ սկյութական Մադիոս թագավորին, որը ժամանակով ավելի մոտ էր դրանց: Այս նկատառումները թույլ են տալիս ենթադրելու, որ Կիաքսարին օգնության եկած «սկյութական» զորքը գլխավորել է ոչ թե Մադիոսը, Պրոտորովսկու որդին, այլ հին հայկական աղբյուրների նշած Պրոտորովսկու-Պարուլրը...: Վերը բերված տեղեկություններն ու նկատառումներն իրավունք են տալիս ենթադրելու, որ նինվեի ավերումից և ասորեստանյան պետության կործանումից հետո Կիաքսարը Պարուլրին ճանաչում է Արմե-Շուպրիա երկրի թագավոր...: Այսպիսով, Ասորեստանի անկման ժամանակաշրջանում Հայաստանում կառավարում էր «որդի Սկայորդույ»⁴⁶ Պարուլրը, որը մեղական «վարբակ» Կիաքսար թագավորին ցույց տված օգնության համար նրա կողմից ճանաչվեց Հայաստանի թագավոր»⁴⁷:

Այսպիսով, նինվեի կործանման տարին՝ 612 թ. որոշիչ էր նաև Հայաստանի պատմության համար: Այդ ժամանակ Արմե-Շուպրիայի թագավորը Պարուլրն էր⁴⁸, իսկ Ուրարտուի թագավորն էր Ռուսա Գ-ն, «էրիմենայի որդին»:

Ի տարբերություն այն կարծիքի, որ էրիմենան, որպես Ուրարտուի թագավոր, իրոք գոյություն է ունեցել⁴⁹, մի շարք գիտնականներ գտնում են, որ Ռուսա Գ-ի հայրանունը («էրիմենախի»)՝⁵⁰ անհրաժեշտ է հասկանալ Ռուսա «էրիմենա (Արմենիա) երկրի ցեղից» — «էրիմենական»⁵¹: Նշենք երկու փաստարկ, որոնք խոսում են «էրիմենա» անվան էթնիկական բնույթի մասին: Ստրաբոնը գրում է, որ Պոսելդոնիոսի (մ. թ. ա. մոտ 135—մոտ 51) հաղորդման համաձայն արաբները երեք ցեղ են կազմել՝ τούτοι μὲν Ἀρμενίους, τούτοι δὲ

⁴⁵ Strabo, XI. 8. 5.

⁴⁶ Վերը նշվածից կարելի է եզրակացնել, որ «որդի Սկայորդույ» նշանակում է ոչ թե որդի սկյութի որդու, այլ սակ ցեղին պատկանող անձնավորության որդի, այսինքն՝ «Սակացու որդի»:

⁴⁷ «Պատմա-բանասիրական հանդես», 1968, № 3, էջ 101—102:

⁴⁸ Б. Б. Пиотровский, О происхождении армянского народа, էջ 21, 24; И. М. Дьяконов, նշվ. աշխ., էջ 313, «Պատմա-բանասիրական հանդես», 1968, № 3, էջ 98:

⁴⁹ Б. Б. Пиотровский, Ванское царство, էջ 115; И. М. Дьяконов, Урартские письмены и документы, М.—Л., 1963, էջ 23, 34; Г. А. Меликишвили, Урартские клинообразные надписи, էջ 426:

⁵⁰ Г. А. Меликишвили, նշվ. աշխ., 287, 296a, 296a.

⁵¹ И. И. Мещанинов, К анализу имени Эримена («Язык и мышление»), 1933, էջ 37, Գ. Ղափանցյան, Ուրարտուի պատմություն, էջ 221, «Պատմա-բանասիրական հանդես», 1968, № 3, էջ 108:

Ἀραμαῖος, τῶς δὲ Ἀραμῶν⁵²։ Ստրաբոնը նշում է, որ եթե արաբները ևրեք ցեղերի են բաժանվել, ուրեմն կարելի է ենթադրել, որ դրանք ունեցել են բազմաթիվ անուններ։ Սակայն նա գտնում է, որ «Ἐρεβωνός» չպետք է լինի, քանի որ այն ավելի բնորոշ էր եթովպացիներին⁵³։ Այստեղ առկա է ցեղանունների բացահայտ շփոթություն։ Հնում հայերին (արամեներին), որոնց էպոնիմը Հայկի կողքին նաև Արամանեակ և Արամ էր⁵⁴, շփոթում էին արամեացիներին հետ, որոնց էպոնիմը նույնպես Արամ էր⁵⁵։ Մովսես Խորենացին գրում է, որ Արամի անունով «զաշխարհս մեր անուանեն ամենայն ազգք, որպէս Յոյնք՝ Արմէն, Իսկ Պարսիկք և Ասորիք՝ Արմէնիկք»⁵⁶։ Իսկ քանի որ արամեացիները նույն արաբներն էին, բաղկացած տարբեր ցեղերից, ուստի անտիկ հեղինակները երբեմն շփոթում էին «արմեն»-հայերին «արամեացի»-արաբներին հետ⁵⁷։ Այդ նաև արդյունք էր այն բանի, որ Հայաստանին հարավից հարևան էին արաբական ցեղերը⁵⁸։ Այդ շփոթության ցայտուն օրինակ է Ստրաբոնից քաղված հատվածը։ Տվյալ դեպքում «Ἀραμενιοι» ցեղանվան կողքին ունենք «Ἐρεβωνοί» բառը, որը իմաստավորվելով «սևեր», ընկալվել է որպես եթովպացիների հատկանիշ։ Որ նշված բառերը կապ ունեն միմյանց հետ, երևում է նաև այն փաստից, որ Ստրաբոնը հաջորդ նախադասությունում բերում է Հոմերոսի հիշատակած «ἄριπτοι»⁵⁹ ցեղը, որը ըստ Պոսեյդոնիոսի բնակվում էր Ասորիքում և նույն արամեացիներն էին⁶⁰։ Սակայն, ինչպես ենթադրում է Յ. Մարկվարտը, ի դեմս «ἄριπτοι» ցեղի, հնագույն հիշատակություն ունենց արմենների մասին⁶¹։

Երկրորդ փաստարկը բխում է Հովսեպոս Փլավիոսի հաղորդումից «Հայաստանի հիմնադիր Ուրոսի» (Ἀρμενίαν ὃς Οὐρος) մասին⁶²։ Այդ անվանաձևը ամենայն հավանականությամբ համապատասխանում է ուրարտական Ռուսա անվան ասուրական՝ Ուրսա ձևին։ Հետևաբար «էրիմենախին» կարող

⁵² Strabo, XVI. 4. 27.

⁵³ Նույն տեղում։

⁵⁴ Մովսես Խորենացի, էջ 17, 19, «Вестник древней истории», 1951, № 2, էջ 299—300, Գ. Տիրացյանը գրում է. «Ինքը՝ Արամը, հավանաբար մի կողմից արձագանք է ուրարտացիների թագավոր Արամին, մյուս կողմից՝ հանդես է գալիս որպես հայ ժողովրդի կազմավորմանը մասնակցած մյուս շերտի՝ փոյուզացիների հարևան արմենների էպոնիմ» («Հայ ժողովրդի պատմություն», հ. I, էջ 480)։

⁵⁵ Ἀραμαῖος ὃς Ἀραμὸς ἔτεγεν (Josephus Flavius, Jewish Antiquities. With English transl. by H. Thackeray, Mass.—London, 1961, vol. IV, I 144, «յոսուհեմուս» Flav) և այլ։

⁵⁶ Մովսես Խորենացի, էջ 42։

⁵⁷ «Հայ ժողովրդի պատմություն», հ. 1, էջ 233, ծան. 10։

⁵⁸ Plinius Secundus, Natural History, in 10 vol. With an English transl. by H. Rackham. Mass.—London, 1957, II, VI. XXX. 118.

⁵⁹ Homer, The Iliad, in 2 vol. With an English transl. by A. T. Murrey. Mass.—London, 1957—1960, II. 783.

⁶⁰ Strabo, XVI. 4. 27.

⁶¹ J. Markwart. Die Entstehung und Wiederherstellung der armenischen Nation. Berlin, 1919, էջ 67. Հմմտ. Влад Бенэцяну, Некоторые вопросы этногенеза армян («Պատմա-բանասիրական հանդես», 1961, № 2, էջ 117)։

⁶² Flav., Ant., I. 145.

Լր էթնիկական ծագում ցույց տալ, հնչելով մոտավորապես այնպես, ինչպես օրինակ Իսիդոր Քարակացին (մ. թ. ա. I դ.) հիշատակում է Տիգրան Բ-ին (Τιγριανός ὁ Ἀρμένιος)⁶³: Հնարավոր է նաև, որ էրիմենա (Արմեն) ցեղանունը Առաջավոր Ասիայի երկրներում հիշատակվել իբրև անձնանուն, էթնիկական ծագում ցույց տվող հատկանիշով⁶⁴, ինչպես այժմ միայն հայերն են օգտագործում Արմեն անունը:

Հաջորդ տասնամյակի դեպքերը որոշիչ էին Ուրարտուի ճակատագրի համար:

Ի. Դյակոնովը նարոպալասարի թագավորության 17-րդ տարվա վերաբերյալ պահպանված արձանագրությունը առաջարկում է կարգալ նաև հետևյալ կերպ. «...Ակկադի (այսինքն Բաբելոնի) թագավորը մոտեցավ [խառան քաղաքին], մարտ [տվեց] Իծալա երկրում [...] շատ երկրների քաղաքները [նվաճեց և] այրեց կրակով: Այդ ժամանակ [Կիաքսարի՝ Ումմանմանդույի թագավորի] զորքը [արշավեց] մինչև Ուրաշտու քաղաքի գավառը»⁶⁵: Ի. Դյակոնովի կարծիքով խոսքը այստեղ դնում է մ. թ. ա. 609 թ. դեպի Ուրարտու կատարված մեղական արշավանքի մասին: Ի. Դյակոնովը նաև հնարավոր է համարում, որ այդ արշավանքը միացյալ էր՝ Մեդիայի և Բաբելոնի կողմից: Այսպես նա դրում է. «կարելի է համոզվածությամբ եզրակացնել, որ արդեն Մեդիայի և Բաբելոնի միջև «ասորեստանյան ժառանգության» բաժանման պահին մ. թ. ա. 605 թ. Ուրարտուն գտնվում էր Մեդիայի գերիշխանության տակ»⁶⁶: Ի. Դյակոնովը այդ տեսակետն է պաշտպանում նաև իր հաջորդ աշխատությունում⁶⁷, եթե Ի. Դյակոնովի վերականգնումը ճիշտ է, ապա կարելի է ենթադրել, որ մ. թ. ա. 609—605 թթ. ժամանակամիջոցում տեղի ունեցած պայքարի ընթացքում Ուրարտուի (որտեղ, հավանական է, մինչ այդ թագավորում էր հայկական թագավորը Ուրարտուի դինաստիական Ռուսա (Գ) անունով)⁶⁸, Վանա լճի ավազանի տարածքը միացվել է Արմեն-Շուպրիային, որը Մեդիայի դաշնակիցն էր, և ստեղծվել է առաջին միացյալ Հայկական թագավորությունը⁶⁹:

Այս ժամանակաշրջանում պետք է տեղի ունենար այդ միավորումը, քանի որ մ. թ. ա. VI դ. առաջին տասնամյակներում հիշատակվում է միայն մեկ ամբողջական երկրի՝ Հայաստանի թագավորը: Դրա ապացույցն է նաև «հայ»

⁶³ Isidori Characeni, *Mansiones Parthicae*. VI ed. K. Müller. Geographi Graeci Minores. Hildesheim. 1965, t. VI.

⁶⁴ Հնում դոյություն ունեին էթնիկական ծագում ցույց տվող բազմաթիվ անձնանուններ, օրինակ. Μαργωνος (Herod. VI. 43), Μαργωνης (Herod. VII. 80), Σαρματας («Корпус Боспорских надписей» (այսուհետև՝ КБН), М.—Л., 1965, 1134, 27, Σινός (КБН, 1137, A15), Ἀζαζίων (КБН, 774), Κοιγος (КБН, էջ 183) և այլն:

⁶⁵ И. М. Дьяконов, *Последние годы Урартского государства* («Вестник древней истории», 1951, № 2, էջ 31):

⁶⁶ Նշվ. աշխ., էջ 32:

⁶⁷ И. М. Дьяконов, *Урартские письма и документы*, էջ 28, ծան. 40:

⁶⁸ «Պատմա-բանասիրական հանդես», 1968, № 3, էջ 108:

⁶⁹ Խոսելով մ. թ. ա. VII դ. վերջի և VI դ. սկզբի ռազմա-քաղաքական իրադրություններին Արմեն-Շուպրիայի ունեցած ակտիվ մասնակցության մասին, Գ. Տիրացյանը նշում է. «Ասորեստանի կործանմանը աջակցելուց հետո, Մարաստանի հետ միասին հայերը նվաճեցին Ուրարտուն, որի տեղը հանդես եկավ Հայկական թագավորությունը» («Պատմա-բանասիրական հանդես», 1966, № 4, էջ 94):

ցեղանվան և «Երուանդ» դինաստիական անվան հետ կապված պատմա-աշխարհագրական անունների առկայությունը Վանա լճի ավազանում⁷⁰։ Որոշ ժամանակ Արարատյան դաշտի ուրարտական քաղաքները (որտեղ, ըստ երևույթին, թագավորում էր Ռուսա Դ-ն)⁷¹, կարող էին մտած չլինել դրա կազմի մեջ, սակայն դա կարող էր տեղի ունենալ 590—589 թթ.։

Հայկական թագավորությունը «որդի Սկայորդույ» Պարույրի գլխավորությամբ, ըստ երևույթին, մոտ երկու տասնամյակ գոյատևում է անկախ, ապա ընկնում է Մեդիայի գերիշխանության տակ։ Պարզ է, որ դա պետք է տեղի ունեցած լիներ պատերազմի միջոցով։ Այդ իրադարձություններն արտացոլվել են Քսենոփոնի «Կյուրոսի պատերազմի» հետևյալ հատվածում. «Դե ասա ինձ, գուպատերազմե՞լ ես մոր կողմից իմ պապ Աստիագեսի և մեդացիների դեմ»։ Հարցնում է Կյուրոսը (այն ժամանակ Աստիագեսի զորավարը)։ Հայոց թագավորը պատասխանում է. «Այո»։ Ապա Կյուրոսը հարցնում է. «Իսկ պարտությունից հետո դու խոստացե՞լ ես որ կվճարես հարկ, պահանջի դեպքում կտրամադրես զորք և չես ունենա ամրություններ»⁷²։ Հայոց թագավորի որդիներն էին Տիգրանը և Սաբարիսը, որոնցից առաջինը Կյուրոսի որսընկերն էր։ Քսենոփոնի հաղորդմամբ Տիգրանի միջամտությունն է, որ փրկում է հորը կործանումից։ Մի այլ հատվածում հայկական թագավորը հիշատակում է նաև հորը. «Հայաստանում կա մոտ 8.000 հեծելազոր և 40.000 հետևազոր, իսկ դրամ՝ հորս թողած գանձերի հետ միասին արծաթով հաշված ավելի քան 3.000 տաղանդ»⁷³։ Ինչպես նշվել է, հայոց թագավորը՝ Տիգրանի հայրը, այստեղ պիտի լինի Մովսես Խորենացու հիշատակած Երվանդ Սակավակյացը, որի հայրը, մեր կարծիքով, Պարույրն էր։

Երվանդ Սակավակյացը⁷⁴ պետք է հայկական գահ բարձրանար մինչ Մեդիայի և Լյուդիայի միջև ծագած առաջին պատերազմը (մ. թ. ա. 589—

⁷⁰ Այս առնչությամբ Ս. Երեմյանը նշում է. «Այդ վայրերը կապված են Երուանդունիների դինաստիայի թագավորների գործունեության հետ այն ժամանակաշրջանում, երբ նրանք տավրիս Այրարատի իշխողները չէին, այսինքն՝ մեդական և արեմենյան ժամանակաշրջանում»։ («Պատմա-բանասիրական հանդես», 1968, № 3, էջ 107)։

⁷¹ Н. В. Арутюнян, К интерпретации надписей на глиняной булле Кармир-Блупа («Պատմա-բանասիրական հանդես», 1960, № 1, էջ 223—229)։

⁷² Xenophon, Cyropaedia. With an English transl. by W. Miller, in 2 vol., Mass.—London, 1953—1960, III. I. 10.

⁷³ Նույն տեղում, III, 1. 33։

⁷⁴ Երվանդի «Սակավակաց» մականունը Ս. Կրկյաշարյանն ընկալելով կարճ ապրած իմաստով, այն առաջնահերթ փաստարկ է համարում իր այն կարծիքի, ըստ որի VI դ. սկզբին Երվանդունիների արքայատոհմի գոյությունը լուրջ հարցականի տակ է։ Նրա մյուս փաստարկներից մեկն էլ այն է, որ Արտուխաս և Արտոքմեն անունների վերընթերցումը տալիս է Արտաշես անունը և դրանով իսկ Ս. Կրկյաշարյանը եզրակացնում է, որ մ. թ. ա. VI դ. Հայաստանում եղել է մեկ այլ արքայատոհմ, որը կարելի է անվանել Արտաշեսյան (Ս. Ս. Կրկյաշարյան, «Երվանդունի արքայատոհմը Հայաստանում» («Պատմա-բանասիրական հանդես», 1973, № 4, էջ 179—186)։ Սակայն ավելի հավանական է «Սակավակաց» մականունը մեկնել որպես բնական կամ բավարարվող՝ սակավապետ։ Այս մեկնությունը հիմնավորվում է նրանով, որ Մ. Խորենացին գովեստով խոսելով Տիգրան Երվանդունու նկարագրի մասին, հատկապես շեշտում է, որ նա կորակուրների և ըմպելիքների մեջ պարկեշտ էր (էջ 73)։

Ինչ վերաբերում է Հայաստանում հիշատակվող Արտուխաս զորավարի (մ. թ. ա. 401) անվան նույնացմանը Արտաշեսին, ապա կա ևս մեկ հիշատակություն այլ Արտուխասի մասին, որը Կյուրոս Բ Երեմյանի դաշնակից վրկանացիների զորավարն էր (Xenophon, Cyrop., V. 3. 38)

585 թթ.): Մինչ այդ պատերազմը սկսելը Կիաքսարը պետք է արշաված լիներ Հայաստանի վրա և Երվանդին պարտագրած լիներ այն պայմանները, որոնք վերջինս չէր կատարել հետագայում, ինչպես տեղեկանում ենք «Կյուրոպեդիայի» վերը նշված հատվածից: Հետևաբար ոչ միայն Աստիագեսի (մ. թ. ա. 585—550) հետ պետք է կապել Երվանդի ստանձնած պարտավորությունները, ինչպես դրում է Քսենոփոնը, այլև Կիաքսարի, քանի որ նա միայն իր թիկունքը ապահովելուց հետո կարող էր արշավել Լյուդիայի վրա:

Երվանդը երկար չէր կարող հանդուրժել իր կախյալ վիճակը, ուստի և պատերազմում է Աստիագեսի դեմ, սակայն պարտվում է և կրկին մնում է կախյալ վիճակում: Սակայն որոշ ժամանակ անց դադարում է հարկ վճարել և Կյուրոսը՝ այդ ժամանակ Աստիագեսի զորավարը, արշավում է Հայաստան՝ վերականգնելու նախկին վիճակը: Քսենոփոնի մոտ վերը նշված հատվածում, ըստ երևույթին, միահյուսվել են նաև Կիաքսարի և Կյուրոսի Հայաստանի վրայով դեպի Լյուդիա կատարած արշավանքների մասին եղած տեղեկությունները: Հայաստանը գտնվում էր արշավող թագավորների թիկունքում, որի ապահովության համար շատ ջանք պետք է գործադրվեր: Այս տեսակետից պատահական չէ Կյուրոսի կողմից խալդայների (խալյուքների) հաշտեցումը հայերի հետ հատկապես այն պայմանով, որ ստրատեգիական կարևոր նշանակություն ունեցող լեռնագագաթները գտնվելու էին մեդացիների ձեռքում⁷⁵: Երկու դեպքում էլ Հայաստանից զորքերի հավաքագրումը և դրամի զանձումը նաև անմիջականորեն ծառայեցվելու էին լյուդիական պատերազմներին:

Ս. Երեմյանը ճիշտ նշում է նաև հաջորդ դարերի ընթացքում հիշատակվող Երվանդունիների ծագման աղբյուր Արդինի-Մուսասիր երկրի հետ, որտեղ գտնվում էր Պլինիոսի (23—79) հիշատակած «Orontes»⁷⁶ ցեղի բնակչության տեղիտորրիան⁷⁷: Ս. Երեմյանը ցույց է տվել, որ Պերգամոն քաղաքում XIX դարում հայտնաբերված հունարեն արձանագրության մեջ հիշատակվող Արմենիայի սատրապ, իսկ հետո իբրև Մյուսիայի սատրապ Օրոնտեսի (Երվանդ)⁷⁸

⁷⁵ Xenoph. Cyrop. III. 2. 22.

⁷⁶ Plin. Nat. Hist. VI. XXX. 118.

⁷⁷ «Պատմա-բանասիրական հանդես», 1968, № 3, էջ 112—113: Տես նաև՝ Հ. Մանանդյան, Պատմա-աշխարհագրական մանր հետազոտություններ, Երևան, 1945, էջ 28:

⁷⁸ Ռ. Դ. Ուիլքինսոն իր հոդվածում (Orontes, Son of Artasyras. Revue des etudes Armeniennes, t. VII. 1970, 448) համաձայն լինելով Ու. Հ. Ուադինգթնի տեսակետի հետ (Revue numismatique, P., 1863, էջ 235—239), նույնպես աղբյուրների և արձանագրությունների հաղորդման հիման վրա եզրակացնում է, որ եղել են երկու սատրապական ապստամբություններ՝ մ. թ. ա. 362—361 թթ. Արտաքսերքս Մենմոնի և 5 տարի անց Արտաքսերքս Օրոսի օրոք: Սակայն ի տարբերություն նախորդի, որը այդ ապստամբություններին մասնակից է համարում երկու Օրոնտեսների (Մյուսիայի և Հալքի), Ռ. Դ. Ուիլքինսոնը միայն մեկ Օրոնտեսի է ճանաչում, միևնույն ժամանակ բնական համարելով Ու. Հ. Ուադինգթնի եզրակացությունը երկուսի մասին, քանի որ վերջինիս բնականաբար հայտնի չէին անցած դարի վերջում հայտնաբերված Անտիոքոս I Կոմմադենացու և Պերգամոնում հայտնաբերված արձանագրությունները R. D. Wilkinson, նշվ. աշխ., էջ 449, ծան. 18): Ռ. Դ. Ուիլքինսոնը նշում է, որ Օրոնտեսը երկրորդ անգամ Մյուսիայում էր մասնակցել ապստամբությանը, ամրացել էր Պերգամոնը և ռազմական համագործակցության մեջ էր մտել Եգիպտոսի հետ: Ապստամբությունը հաղթանակում է և ապա մ. թ. ա. 349 թ. Օրոնտեսը Աթենքում ոսկե պսակ և քաղաքացու պատիվ է ստանում: Ապա Ռ. Դ. Ուիլքինսոնը ենթադրում է, որ Օրոնտեսը կամ պարտվում է Արտաքսերքս լեքոսից, կամ էլ մեկ տասնամյակ տևած պայքարից հոգնած խաղաղվում է (նույն տեղում):

(մ. թ. ա. V—IV դդ.) բակտրիական ժագման մասին եղած հաղորդումը ոչ թե անհեթեթություն է, ինչպես թվում էր առաջին հայացքից, այլ կապված է Հայաստանի Զարասպ լեռան մոտ գտնվող շրջանի հետ: Նա գտնում է, որ Զարասպ անունը կապված է Բակտրա քաղաքի և Բակտրիանա երկրի այլ՝ Զարիասպա անվան հետ և ապա եղրակացնում, որ «Պերգամոնի արձանագրության «Բակտրիան», անշուշտ, առաջ է եկել «Զարասպ» անվան նույնացման հոդի վրա»⁷⁹, ինչպես վերը նշեցինք, իրանական ցեղերի տեղաշարժերը դեպի արևմուտք պետք է տեղի ունեցած լինեն մ. թ. ա. VII դ. առաջին քառորդում և կապված էին Առաջավոր Ասիայի որոշ երկրներում և հատկապես Մանայում սկյութական գերիշխանության հաստատման հետ: Այս միտքը առավել ևս հաստատուն է դարձնում Ս. Երեմյանի հետևյալ նշումը. «Հետաքրքրական է, որ մեդական և հին հայկական դինաստիաները դուրս եկան այդ Մատինենից, որը համապատասխանում է Մանա երկրին և նրան հյուսիս-արևմուտքից սահմանակից Արդինի-Մուսասիրին, ինչպես և ուրարտական դարաշրջանի Պարսուա (Պարսուաշ) երկիրը»⁸⁰: Այս առումով պատահական չէ, հայերին «Ասքանազյան ազգ»⁸¹ կոչելը, որը, թերևս, խոսում է հին հայկական դինաստիայի ժագման մասին: Այն հիշատակվում է նաև Աստվածաշնչում. «Պատուէր տուր յինէն և Այրարատեան թագաւորութեանցն և Ասքանաղեան գնդին»⁸². «Այրարատեան» և «Ասքանաղեան» անունների առկայությունը, ըստ երևույթին, վերաբերում է այն ժամանակաշրջանին, երբ կողք-կողքի գոյատևում էին Ուրարտուի վերջին շրջանի հայկական և Արմե-Շուպրիայի հայ-սկյութական թագավորությունները⁸³: Այսպիսով, կարելի է եզրակացնել, որ հին Հայկական պետությունը անկախ գոյատևում է իր կազմավորման առաջին երկու տասնամյակներում: Հաջորդ ժամանակաշրջանում, մինչ Դարեհ Ա-ի (մ. թ. ա. 522—485) աշխարհակալ պետության սատրապությունների վերածվելը, այն պայքարում է անկախության համար՝ Մեդական և ապա Պարսկական պետությունների դեմ:

⁷⁹ Տեղին է հիշել Սարգսի աշխատությունից վերը բերած հատվածը, ուր խոսվում էր սակերի Բակտրիանայում և Հայաստանում կատարած նվաճումների մասին:

⁸⁰ «Պատմա-քանասիրական հանդես», 1968, № 3, էջ 113: Հմմտ. Վ. Ստրովիի եղրակացությունը. «Մեդական ցեղերին համահավասար պարսկական ցեղերը պատմության հնագույն ժամանակաշրջանում բնակվել են Հայաստանին անմիջապես մերձակա վայրերում» (B. B. Струве, Армянская проблема, «Советская этнография», VI—VII, М.—Л., 1947, էջ 118—120):

⁸¹ Կորյուն, Վարք Մաշտոցի, աշխարհաբար թարգմ., ներածական ուսումնասիրությամբ, առաջաբանով և ծանոթագրություններով Մ. Արեգյանի, Երևան, 1962, էջ 87:

⁸² Երեմյա, ՄԱ, 27: Ի. Դյակոնովի կարծիքով՝ Մ և ՄԱ գլուխներում նկարագրված անցքերը վերաբերում են մ. թ. ա. 605—590 թթ. միջև ընկած ժամանակաշրջանին: Ինչ վերաբերում է «Ասքանազյան» անվանը, ապա նա այն դիտում է Առաջավոր Ասիայում անկախությունը կորցրած նախկին սկյութական թագավորության հիշատակություն (И. М. Дьяконов, Последние годы Урартского государства, էջ 32—33, ծան. 1, էջ 34):

⁸³ Զ. Թոյնբի և է. Մայերը Արմե-Շուպրիայի տեղում նշում են Arminiya, իսկ Հայաստանի մասդած մասը Urartu և շնայած որ քարտեզները թվագրված են համապատասխանաբար 556 թ. մ. թ. ա. և 480 թ. մ. թ. ա., նրանցում արտացոլված էլուծը ամենայն հավանականությամբ վերաբերում է նաև մ. թ. ա. VII դ. վերջին և VI դ. սկզբներին (J. Toynbee and Ed. D. Myers. Historical Atlas and Gazetteer. Oxford. 1959, քարտեզներ № 19 և 20, էջ 112—113):

ИЗ ИСТОРИИ АРМЕНИИ VII—VI вв. до н. э.

Э. Л. ДАНИЭЛЯН

Резюме

История Армении на рубеже VII—VI вв. до н. э. тесно связана с падением Ассирийского и Урартского царств и возвышением Мидийского и Вавилонии.

В 20-х гг. VII в. до н. э. во главе союза племен Арме-Шуприи стал Паруйр — сын Скайорди (букв. сакид), который за участие в разгроме ассирийских войск под Ниневией в 612 г. до н. э. был признан мидийским царем Киаксаром (625—584) царем Армении (видимо, вначале в пределах Арме-Шуприи).

Иосиф Флавий (Ant., I, 145) возводит происхождение армян к Уросу (ассир. Урус, урарт. Руса). Из туманного сообщения Страбона об арабских племенах видно параллельное упоминание "ἀρμενίοι—ἑρμενοὶ ἄριμοι" (XVI, 4, 27). Приведенные свидетельства говорят в пользу того, что имя отца Русы III-го «Эримена» можно понимать как этническое название, т. е. как имя эпонима армян — Араманеак или Арам по Мовсесу Хоренаци.

После мидийского похода, вероятно, в течение 609—605 гг. до н. э., территория бассейна озера Ван была присоединена к царству Паруйра, который был союзником Киаксара. Таким образом, к этому периоду можно отнести создание объединенного армянского царства.

Древнее армянское государство сохраняло независимость в течение первых двух десятилетий своего существования. В следующий период, вплоть до превращения в сатрапию государства Дария I-го (522—485), оно боролось за независимость против Мидийского, а затем и Персидского государств.